

Inschi Spràach, ds Obarsàxar Titsch

von Maria Ettlin-Janka

A Schuppa Goofa sind as pàrr Chind.
Dia tiant geela und tschimpfa, wenn sch zama sind.
Dr Eeni und ds Àani sind noochi Verwandti.
D Gschwischtarat Chind im dritta Gràad varwàndti.

In Deech phàalta heisst dràn teecha, net vargassa.
Ds Vee treecht ma, wills au Wàssar brüücht bim frassa.
Üss ama Schissali chà ma Milch odar Ggaffee triicha.
Wenn apis net guat schmegg, sa de tuats stiicha.

An Schnitta Broot mit Britschi und Hung
ischt as Hungbritschalti fir Àalt und Jung.
Àma lufttrechnata Schwiibe siascht dàa Tschungga.
Zum Zniini chàscht au achlei Tschuggalàada mungga.

Fir Paaht zamazwischa brüüchts an Basma.
Mit Gràss ubarwàggssa heisst: Varwàssma.
An Wual Schnee odar Hauw, dàs ischt an hüffa.
Wennd Engs hescht, sa chàscht net schnüüfa.

Im Làngsi schlassmats, wenn dr Schnee schmilzt.
Ubaràll isch as nàss, as het Güttla, wà spritzt.
Inschi Püüra màchant, wenna ààbarat, ds Làngsiwaarch.
Amàal-zwei, afart-zwurrat gaant sch au ins Gmawaarch.

Dia Tiarli, wà im Gràss ummajuggant, sind Hauwstràffla.
Àbar au da Tritt vo da Stagana siat ma dàa Stràffla.
Johànnis- und Preisalbari, das sind Süüfa und Griifla.
Pàssat üüf – tiat nisch dara Weertar net vartiifla!

Da Vogalbari siat ma Giratsch, da Bluama Maija.
An Frosch ischt an Hoschpal, d Àlparoosa sind Heitamaija.
Eidechsa sind Ländtiachli und d Eichalhääjar Jaagga.
Da Chafarli siascht Guagi und da Chraaja Ggràagga.

Inschi Litli waarchant und schàffant odar trafiggant.
Üssruawa tiant sch gwiss nü d Nàcht, wenn sch liggant.
Wenn sch varcheltat sind, sa sind sch in a Wind.
Schii heint dr Niiffa, an Nàsa wà traupfat und rinnt.

Am Fiiràabat zamacho zum nauis bladara und plagiara,
ischt nàam Znàcht patschiffig hengara und tischgariara.
Z Hengart, uf Psuach, geit magaari au an Purscht, an Chnàba,
wenn ar an jungi Frau, an Jumpfara suacht fir ds Laba.

Schiff und Gschirr nawar mit nisch, wewar roba tiant,
wewar mit Sàck und Pàck àn as nüuws Oort witarzijant.
Im scheena Obarsàxa z hüsa tuat jeda gniassa.
In dr Fremdi het ar lengs, dart tuat ar vardriassa.

Inschi Heimatspràach ischt net gàar fiini.
Àbar ich bin stulz drüff, schii ischt miini.
Ins Titsch teent fir mich wia Gsàng.
Und as vardiant an eerschte Ràng!